

Yuhana letereŋi niŋcyiŋi

Mpe yii à yaa yii cè mà jwo yii jyè letereŋi funŋɔ jwumpe e ke

Yuhana mpyi Yesu tùntunŋɔ. Uru u à nge letereŋi sém'a tùugo dánafeebil'á Azi kùluni i. U à li cyêe dánafeebii na na pi nyɛ a yaa pi a ŋko pire nyɛ na kapegigii pyi mɛ, pi à yaa pi a yyérelɛ pi kapegigii na, naha kurugo yɛ Yesu à kwû, maa pi kapegigii jyé a láha pi na.

U à li cya dánafeebil'á na pi piye kyaa táan piy'á, naha na yɛ Kile u à fyânha a wuu kyaa táan uy'á. Cyelentiibii kafinivinibii pìi mú na mpyi wani, pir'à jwo na Yesu nyɛ a pa sùpya diŋyɛni i mɛ, na Kile Jyaŋi wi kann. Yuhana à li cya dánafeebil'á na pi a piye kàanmucaa pire na.

Jwumpe pu nyɛ na shìŋi sèe wuŋi kaan ke

1 ¹ Mà jwo diŋyɛni u dá ke, nge u mpyi wani ke, wuu à uru kyaa lógo, wuu nyiigil'à u nya, wuu à u wíi maa bwɔn u na ná wuu cyeyi i. Jwumpe pu nyɛ na shìŋi sèe wuŋi kaan ke, puru kyaa li. ² Kile à uru shìŋi cyêe wuu na. Shìŋi niŋkwombaani u mpyi Tufooni Kile taan ná u à u cyêe wuu na ke, wuu à u nya, wuu na u shɛnre yu, uru kyaa wuu nyɛ na yu yii á. ³ Ŋgemu wuu a nya maa u kyaa lógo ke, uru kyaa wuu nyɛ na yu yii á, bà yii si mpyi si jyè wuu ŋgwòŋi i mɛ. Wuu pi ke, wuu ná Tufooni ná u Jyaŋi Yesu *Kirisita pi nyɛ wwoŋɛɛ. ⁴ Wuu na ŋcyii karigii sémeni si ntun yii á, bà wuu funntange si mpyi si fûnŋɔ mɛ.

Wuu à yaa wuu a jaare bènmpɛ e

⁵ Jwumpe wuu à lógo u á si njwo yii á ke, puru pu nyɛ: Kile na nyɛ bènmpɛ, numpire cyaga nyɛ a sii u e mɛ. ⁶ Wuu aha jwo na wuu ná uru na nyɛ wwoŋɛɛ, mà li ta wuu na jaare numpini i, wuu na fini, wuu nyɛ sèŋi ŋuŋ'i mɛ. ⁷ Ŋka wuu aha a jaare bènmpɛ e, bà Kile yabiliŋi nyɛ bènmpɛ e mɛ, wwoŋɛɛge sí n-pyi wuu ná wuye shwɔhɔl'e. U Jyaŋi Yesu sishange sí wuu *kapegigii puni jyé n-láha wuu na. ⁸ Wuu aha jwo na wuu nyɛ na kapegii pyi mɛ, wuu na wuye ŋwɔ fáanŋi, sèŋi nyɛ wuu á mɛ. ⁹ Ŋka wuu aha ntèn li taan, na wuu na nyɛ kapimpyimii, Kile sí cyi yàfa wuu na, si ntiimbaani puni jyé n-láha wuu na, naha na yɛ ŋwɔmɛɛ niŋkinfoo u nyɛ u wi, u à tii. ¹⁰ Wuu aha jwo na wuu nyɛ a kapii pyi mɛ, wuu maha Kile pyi kafiniviniwe, u jwumpe nyɛ wuu funŋ'i mɛ.